

दिनांक 17.03.2025

समय: 18.45 बजे

- भारत अर न्यूजीलैंड रे बीचे रक्षा अर खेल समेत केई समझौते व्हा-प्रधानमंत्री नरेन्द्र मोदी न्यूजीलैंड रा प्रधानमंत्री ऊं आपसी सहयोग माथे चर्चा करी।
- उपमुख्यमंत्री दिया कुमारी केन्द्रीय पर्यटन मंत्री गजेंद्र सिंह शेखावत ऊं मिल ने प्रदेश मांय सैलाणी विकास ऊं जुड़्या पहलुआं माथे चर्चा करी।
- राजस्थान पुलिस कानी ऊं महिलावां ने हका रे प्रति जागरुक करण माथे सुरक्षा सखी पखवाड़ो मनायो जावे।
- पश्चिमी विक्षोभ रा असर ऊं प्रदेश मांय तीन-चार दिन चाल्यो आंधी-बिरखा रो दौर थम्यो-आवता दो दिनां मांय तपमान मांय बढ़वार रा आसार।

000

भारत अर न्यूजीलैंड रे बीचे आज केई हलकां मांय दो पक्षीय करार व्हीया। आ मांय रक्षा, शिक्षा, खेल, बागवानी अर वानिकी रा पांच करार पाना माथे दस्तखत करी ज्या। प्रधानमंत्री नरेन्द्र मोदी आज नुवी दिल्ली मांय न्यूजीलैंड रा प्रधानमंत्री क्रिस्टोफर लक्सन रे साथे बतळ करी। आ मांय भारत-न्यूजीलैंड संबंधा रा न्यारा-न्यारा पहलुआं माथे संबंधों के विभिन्न पहलुओं पर चर्चा करी ज्यी। श्री मोदी कह्यो के दोन्यु देशा हिफाजती साझेदारी ने और मजबूत करण रो फैसलो कर्यो। प्रधानमंत्री कह्यो के दोन्यु देशां रे बीचे आपसी कारोबार अर निवेश ने बधावो मिलेला।

.....

आप रा बयान मांय श्री लक्सन कह्यो के दोन्यु पगस आपसरी मांय फायदा रा मुफ्त करोबार सारु तियार है। इण ऊं पैला न्यूजीलैंड रा प्रधानमंत्री राजघाट माथे महात्मा गांधी री समाधि माथे वां ने श्रद्धांजलि अर्पित करी। श्री लक्सन रायसीना डायलॉग रा उद्घाटन सत्र रा खास मेहमान है। प्रधानमंत्री श्री मोदी आज नुवी दिल्ली मांय डायलॉग रा दसवा संस्करण रो उद्घाटन कर रीया हा। संवाद कार्यक्रम मांय 125 देशां रा नुमाइन्दा हिस्सो ले रिया है।

000

प्रधानमंत्री नरेन्द्र मोदी कह्यो है के केन्द्र सरकार कानी ऊं डीबीटी री मार्फत जो रकम भेजी जावे है वां बिना किणी बिचौलिया रे सिधा लाभार्थी रा बैंक खाता मांय पूग री है। श्री मोदी अमरीकी पॉडकास्टर अर एआई शोधकर्ता लेक्स फ्रिडमैन रे साथे आप री बतळ मांय आ बात कही।

.....

अमरीका रा राष्ट्रपति डोनल्ड ट्रंप ई इण बतळ ने आज आप रा सोशल मीडिया प्लेटफॉर्म माथे साझा कर्या।

000

उपमुख्यमंत्री अर पर्यटन मंत्री दीया कुमारी आज नुवी दिल्ली मांय केन्द्रीय पर्यटन मंत्री गजेंद्र सिंह शेखावत ऊं मुलाकात करी। ई दौरान वणा राज्य मांय पर्यटन विकास अर सैलाणी ठौड़ां रा संरक्षण ऊं जुड़्या केई बिंदुआं माथे चर्चा करी। उपमुख्यमंत्री सैलाणी विकास रा नुवां आयाम तलाशण, बॉर्डर टूरिज्म रो बधावो देवण रे साथे ई ट्राइबल अर रुरल टूरिज्म ने ले र ई बतळ करी। दीया कुमारी राज्य मांय पर्यटन री न्यारी-न्यारी मांगां ने ले र केंद्रीय मंत्री ने कागद ई सूप्यो।

000

राज्यपाल हरिभाऊ बागडे चौखा नियोजन अर प्रबंधन रे साथै साफ़गोई कार्य संस्कृति विकरित करण माथे जोर दियो है। वणा राष्ट्रहित ने सब ऊं ऊपर राखता काम करण री बात कही है। श्री बागडे आज राजभवन मांय राजस्थान प्रशासनिक अर लेखा सेवा रा 2024 बैच रा प्रशिक्षु अहलकारां ऊं मिल्या। राज्यपाल कह्यो के अहलकारां ने जन कल्याण रा कामां अर विकास योजनावां ने असरदार तरीका ऊं लागू करण सारु हमेशा समर्पित रहवणो चाहिजे। ई दौरान श्री बागडे ट्रेनी अहलकारां रा काम अर सिखावण री जाणकारी ली अर वां ने देश रा विकास मांय सार्थक भूमिका निभावण सारु प्रेरित कर्या।

000

मेवाड़ रा पैली रा राजपरिवार रा ठावां सदस्य अरविन्द सिंह मेवाड़ रो आज उदयपुर मांय अंतिम संस्कार कर दीरीज्यो। वां रा पुत्र लक्ष्यराज सिंह मुखाग्नि दी। श्रीजी री आखिरी जात्रा संवारा 11 बज्या सिटी पैलेस मांय वां रा रहवास शंभु पैलेस ऊं सरू व्हे र अंत्येष्टी ठौड़ महासतियां पूगी। घणी तादाद मांय लोगां वां ने आखिरी विदाई दी।

000

राजस्थान महिला कांग्रेस अध्यक्ष रा रूप मांय आज सारिका सिंह ओहदो संभाल लियो। वणा प्रदेश कांग्रेस मुख्यालय मांय आप री नुवी पारी री कमान संभाळी। ई मौके प्रदेश कांग्रेस अध्यक्ष गोविंद सिंह डोटासरा अर विपख रा नेता टीकाराम जूली समेत केई नेता अर घणी तादाद मांय कार्यकर्ता मौजूद रह्या।

000

राजस्थान पुलिस कानी ऊं महिलाओं अर बालिकावां ने हकां सारू जागरूक बणावण सारू सुरक्षा सखी पखवाड़ो मनायो जावे। अतिरिक्त पुलिस महानिदेशक मालिनी अग्रवाल बतायो के सुरक्षा सखियां पुलिस अर महिलावां रे बीचे अहम कड़ी होवे है। सुरक्षा सखियां महिलावां अर अर बालिकावां ने आप री हिफाजत अर कानूनी हका रे प्रति सावचेत राखण रो संदेश देवे है।

000

दौसा रेलवे ठेशन ने ऊर्जा दक्षता ब्यूरो कानी ऊं "शून्य प्लस" अवार्ड दीरीज्यो है। इण ठेशन ने सौर ऊर्जा काम मांय लेवण ऊं बिजली बचत मांय अहम योगदान देवण सारू चुणी ज्या है। उत्तर-पश्चिम रेलवे रा मुख्य जनसम्पर्क अहलकार कैप्टन शशि किरण बतायो के राजस्थान मांय "शून्य प्लस" अवार्ड मिलण वाळो ओ पैलो ठेशन बण ग्यो है।

000

शुद्ध आहर पर वार अभियान रे तैत मिलावट खोरा रे खिलाफ असरदार कार्यवाही करता आज पाली मांय खाद्य सुरक्षा महकमों मोटी कार्यवाही करी है। मिलावट रा शक रा आधार माथे 11 हजार 565 लीटर तेल ने सीज करी ज्या है।

000

राज्य मांय कैप्टिव ब्रीडिंग तकनीक ऊं पैली बार शुतुरमुर्ग रो कामयाब प्रजनन व्ह्यो है। जयपुर चिड़िया घर मांय शुतुरमुर्ग अवंतिका रा अंडां ऊं नवजात रो जन्म व्ह्यो। जयपुर जू रा उपवन संरक्षक वन्यजीव विजयपाल सिंह बतायो के ई कामयाबी सारू सगळा मांय उमाव है। वणा बतायो के आ प्रजनन प्रक्रिया चैन्नई ऊं लाई ज्या जोड़ा ऊं व्ही। इण ने पशु चिकित्सा अहलकार डॉ. अशोक तंवर री देख-रेख मांय पूरा करी ज्या।

000

फलौदी जिला रा खींचन गांव मांय आज कुरजां महोत्सव व्ह रह्यो है। सैलाणी मेहकमां कानी ऊं ओ आयोजन कर्यो जावे। पहली बार व्हे रिया ई उत्सव मांय पक्षी कुरजां री अठखेलियां ने निहार ने खुश व्हे रिया है। वठे ई लोक कलाकारां री प्रस्तुतियां ई सैलाणियां अर लोगां ने आनंदित कर रिया है।

000

श्रीगंगानगर जिला रा अनूपगढ़ मांय आज एक सड़क हादसा मांय तीन लोगां री मौत व्हे ग्यी। हादसो राष्ट्रीय राजमार्ग 911 माथे व्ह्यो जठे एक रोडवेज बस रो टायर फटण ऊं बेकाबू व्हे र ई-रिक्शा ऊं टकरा ग्यी। अनूपगढ़ थाना प्रभारी ईश्वर जांगिड़ बतायो के हादसा मांय ई-रिक्शा मांय सवार बाप अर दो बेटा री मौत व्हे ग्यी अर तीन दूजा घायल व्हे ग्या।

000

चूरू जिला रा तारानगर मांय आज नेत्र शिविर लगायी ज्यो। जिला अंधता निवारण समिति कानी ऊं एक निजी संस्थान री मदद ऊं ओ शिविर लगायी ज्यो। ई दौरान डॉक्टरां कोई अढाई सौ लोगां री आंख्यां री जांच करी। वठे ई 76 लोगां रा ऑपरेशन करी ज्या।

000

आथूणी विक्षोभ रा असर ऊं तीन-चार दिन चाल्यो आंधी अर बिरखा रो सिलसिलो अबै थम ग्यो है। लारला 24 घंटां मांय बीकानेर अर झुंझुनूं मांय हल्की बिरखा व्ही। वठे ई आठ ऊं बत्ती शहरां मांय पारो 34 डिग्री सेल्सियस ऊं ऊपर दर्ज करी ज्यो। डूंगरपुर अर चित्तौड़गढ़ मांय दिन रो तापमान 35 दशमलव 3 डिग्री सेल्सियस मापी ज्यो, जो सामान्य ऊं कोई दो डिग्री बत्ती है। मौसम

केन्द्र जयपुर मुजब प्रदेश मांय मौसम साफ रहवण अर तापमान मांय 2 ऊं 3 डिग्री सेल्सियस री बढवार री आश है।

000

भारतीय अंतरिक्ष अनुसंधान संगठन—इसरो रा अध्यक्ष वी. नारायणन बतायो के केंद्र सरकार चंद्रयान-5 मिशन ने मंजूरी दे दी है। ओ साल 2040 ताई चंद्रमा माथे मानव मिशन भेजण रा देश रा लगस सारु महताऊ कदम है। इण रे अलावा, सरकार 2035 ताई “भारतीय अंतरिक्ष स्टेशन” थापित करण री री योजना ने ई मंजूरी दे दी है। चेन्नई मांय एक कार्यक्रम रे दौरान नारायणन बतायो के इसरो केई मोटा प्रोजेक्ट माथे काम कर रियो है अर अंतरिक्ष मांय आप रा बूता ने मजबूत करण सारु तेजी ऊं आगे बध रह्यो है। नारायणन बतायो के भारत अजै ताई 131 उपग्रह लॉन्च कर चुक्यो है, जिण मांय ऊं केई सार्क देशां ने ई दीरीज्या है।

000

प्रधानमंत्री नरेन्द्र मोदी ई महीना री तीस तारीख ने आकाशवाणी ऊं प्रसारित कर्या जावण वाळा खास कार्यक्रम मन की बात मांय विचार बतावेला। आ मन की बात कार्यक्रम री 120वीं कड़ी व्हेला। ई सारु आप ई 28 मार्च ताई मुफ्त नम्बर 1 8 0 0 – 1 1 – 7 8 0 0 माथे राय भेज सको हो। ई सागे ई 1922 नम्बर माथे मिस्ड कॉल दे र एस एम एस रे जरिये मिल्या लिंक ऊं ई सुझाव दिया जा सके है। ई रे अलावा नरेंद्र मोदी एप अर माई जीओवी ओपन फोरम रे मार्फत ई सुझाव दिया जा सके है।

000

कबड्डी विश्व कप 2025 आज ऊं इंग्लैंड मांय सरु व्ह्यो। ई बगत भारत री टीम रो मुकाबलो इटली ऊं व्हे रह्यो है। ओ मैच वॉल्वर हैम्प्टन मांय खेल्यो जावे। सात दिन रा ई टूर्नामेंट मांय 60 ऊं बत्ती मुकाबला खेल्या जायेला। पुरुष वर्ग मांय 10 टीमां हिस्सो ले री है। आं ने दो ग्रुप मांय बाटी ज्या है।

000